

摘藻堂四庫全書薈要

史部

欽定四庫全書薈要卷八千三百四十三

欽定大清通禮卷十三

吉禮

太歲

祀

太歲之禮初春為迎歲暮為祖正殿奉

太歲神位南向

神位依年建干支黃紙墨書某年
太歲之神覆於位上豫設龕內

廡

十二月神位司春秋者東位西向司夏冬者西位東向歲以孟春上旬諏吉及歲除前一日遣官將事豫期承祭官分獻官暨執事官各於邸第致齋太常寺卿具祝版省牲牢率屬潔除殿廡內外展神幄恭請殿廡

神位奉安於神座如式

右諏吉致齋供具

至日五鼓太常寺官具器陳正殿牛一羊一豕一

登一鉶一簋簋各二籩豆各十琖三十鑪一鐙二
設案一於殿中少西北向供祝版設案一於東西
向陳帛一色白香盤一尊一爵三陳福胙於尊爵之
旁加爵一兩廡東西各二案陳設均與正殿同又
設尊案各一於廡南陳帛六色白香盤二尊二爵六
凡牲陳於俎帛實於筐尊實酒承以舟疏布霽勺
具樂部率太常協律郎設中和韶樂於殿內東西
陳樂舞於樂懸之次太常寺設洗於東階下少南

承祭官位中階下分獻官位承祭官後甬道左右
均北面司祝司香司帛司爵各一人分立祝案尊
案之次司樂協律郎樂工歌工舞佾序立東西樂
懸之次典儀一人立殿外東階掌燎率燎人立燎
鑪南均如常儀

右陳設辨位

昧爽承祭官分獻官朝服詣壇贊禮郎豫引分獻
官至拜殿北階下左右祇俟贊引太常寺贊禮郎

二人引承祭官由拜殿南左門入出北右門降階
詣盥洗位贊禮郎贊盥洗承祭官盥手畢引至拜
位前北面立分獻官均就拜位序立典儀贊樂舞
生登歌執事官各共迺職武舞執干戚進贊禮郎
贊就位承祭官就位立典儀贊迎

神司樂贊舉迎

神樂奏保平之章辭曰協茲五紀歲月日辰天惟顯
思神職攸分於赫太歲統馭百神承天之德陰隲

下民協律郎舉麾工鼓祝樂作贊禮郎贊詣

神位前引承祭官升東階入殿左門詣香案前立贊

上香司香跪奉香承祭官舉炷香次三上辨香畢

贊復位引承祭官復位贊跪叩興承祭官行三跪

九叩禮分獻官均隨行禮興協律郎偃麾工戛鼓

樂止

凡樂以舉麾鼓祝作以偃麾戛鼓止後同

典儀贊奠帛爵行初獻

禮有司揭尊罍勺挹酒實爵司樂贊舉初獻樂奏

定平之章辭曰禮崇明祀涓選休成潔齋滌志量

幣告誠祈福維何福我蒼生陳饋奉酌瞻仰雲旌
樂作司樂舉節舞干戚之舞

凡舞以節領之
導引進退後同

司帛

司爵進至

神位前司帛奉篚跪奠於案三叩興司爵奉爵立獻
於正中皆退司祝至祝案前跪三叩興奉祝版跪
案左樂暫止典儀贊讀祝贊禮郎贊跪承祭官暨
分獻官皆跪司祝讀祝辭曰維某年月日

皇帝遣某官某致祭於某年

太歲之神曰

茲當孟春歲既暮矣

謹以牲帛酒果庶品之儀致

祭尚

饗讀畢興以祝版跪安篚內叩如初興退樂作贊禮
郎贊叩興承祭官暨分獻官均行三叩禮興兩廡
贊禮郎引分獻官各詣

神位前上香執事生奠帛獻爵畢引分獻官復位如
儀樂止武功之舞退文舞執羽籥進典儀贊行亞
獻禮司樂贊舉亞獻樂奏嘏平之章辭曰百末蘭

生有飫其香升歌清越磬管鏘鏘牲牷肥腍嘉薦

令芳神其歆止在上洋洋樂作舞羽籥之舞司爵

奉爵獻於左如初獻儀樂止典儀贊行終獻禮司

樂贊舉終獻樂奏富平之章辭曰執事有嚴再拜

稽首三爵既升以妥以侑顒若有孚肅茲籩豆神

其歆止人民曼壽樂作舞同司爵奉爵獻於右如

亞獻儀兩廡以次畢獻樂止文德之舞退典儀贊

賜福胙執事生二人奉福胙進至

神位前拱舉由中道出降階詣拜位右立接福胙執
事生二人由西廡降階進至拜位左立贊禮郎贊
跪承祭官跪左右執事生皆跪贊飲福酒右生進
福酒承祭官受爵拱舉授於左次受胙如飲福之
儀畢贊禮郎贊叩興承祭官三叩興又贊跪叩興
承祭官暨分獻官均行三跪九叩禮興典儀贊徹
饌司樂贊舉徹饌樂奏盈平之章辭曰王省惟歲
有報有祈六氣無易平衡正璣嘉生蕃祉澤及蜎

飛百禮以洽承神吉輝樂作徹畢樂止典儀贊送
神司樂贊舉送

神樂奏豐平之章辭曰神兮旋馭肅瞻景光靈飀上
下無體無方嘉承惠和億兆溥將歲歲大有神其
迪嘗樂作贊禮郎贊跪叩興承祭官暨分獻官均
行三跪九叩禮興樂止典儀贊奉祝帛饌送燎司
祝司帛詣

神位前咸跪三叩司祝奉祝司帛奉篚興司香跪奉

香司爵跪奉饌興以次恭送燎所兩廡香帛饌均

送焚燎

歲暮並奉紙書于支送燎

贊禮郎引分獻官退承祭官

避立拜位之西俎祝帛過復位立典儀贊望燎贊

禮郎引承祭官詣燎位視燎贊禮郎告禮畢太常

寺官恭請

太歲神位並兩廡

神位復於龕內如儀各退

右行禮

歲孟夏常雩後間不雨遣官禱於

太歲壇與

天神

地祇同日舉行文武官應陪祀者咸與祈禱

以參之前一分祈

前

期各於邸第致齋一日太常寺具祝文

翰林院隨時撰擬

潔器陳備脯醢果實埽除殿內外至日設樂懸樂舞於殿上承祭官位階下執事官司樂協律郎樂工歌工舞佾序立如常祀儀陪祀官位庭中左右

東西各五班重行異等糾儀御史二人禮部祠祭司官二人分立祀官左右均素服將事

迎神樂奏需豐之章辭曰持元化兮富媪神東歲籥兮六氣均馳雲車兮風旂殷闐闐兮天門情徬徨兮孔殷神之來兮康我民

初獻樂奏宜豐之章辭曰薦嘉幣兮芳醴清練予素兮升飴馨紛肸蠭兮格歆甘膏沃兮神所令

亞獻樂奏晉豐之章辭曰啟山罍兮攝椒漿侑神

宮兮靈洋洋族雲興兮使我心若惠嘉生兮降康
終獻樂奏協豐之章辭曰清寧兮三斟揚翟籥兮
載愉靈回翔兮六幕澤霽霈兮遍八區

徹饌樂奏應豐之章辭曰禮儀備兮孔時音繁會
兮徹不遲昭靈貺兮迓蕃祉田多稼兮汜濩之

送神樂奏洽豐之章辭曰顧億兆兮誠求渥甘澍
兮神之休慶時若兮百昌遂惠我無疆兮歲有秋
凡儀節皆典儀唱贊舉樂皆司樂唱贊初獻舞干

戚之舞亞獻終獻舞羽籥之舞兩廡不分獻不飲
福受胙餘儀與常祀同

右祈告

既得雨與

天神

地祇同日報祀遣原祈雨官將事及陪祀官咸致齋前
期具祝版眡割牲至日陳設牲牢登鉶簠簋簠簋豆
與常祀同承祭官陪祀官均朝服行禮其餘儀節

樂章均如祈告儀雨潦祈晴冬旱祈雪報亦如之
右報祀

祀

真武神之禮每歲

萬壽聖節遣官一人詣

顯佑宮將事是日廟祝潔埽廟宇內外太常寺官具
器陳設果盤五餅餌盤十有五鑪一鐙二設案一
於南少西北向供祝版設案一於東西向陳禮神

制帛一色香盤一茶棧三設洗於東階下少南和

聲署官設樂於西階上鼓一笙一管二雲璈一篴

二板一承祭官拜位在殿內正中司祝司香司帛

司棧各一人分立祝案尊案之次典儀立於殿東

檐下掌燎立燎鑪之南黎明承祭官朝服詣廟贊

引太常寺贊禮郎二人引承祭官由左側門入贊

盥洗承祭官盥手畢升東階入殿左門至拜位前

北面立典儀贊執事官各供廼職贊禮郎贊就位

承祭官就位立典儀贊迎

神和聲署樂作辭曰居所躋星軫象緯環拱辰貞元
運轉藏用顯仁宥密基命毓和葆順潔粢醴以昭
信日襄哉贊大鈞贊禮郎贊詣上香位引承祭官
詣香案前立贊上香司香跪進香承祭官舉炷香
三上瓣香畢贊復位引承祭官復位贊跪叩興承
祭官行三跪九叩禮興典儀贊行初獻禮司帛司
璣各進至

神位前司帛奉篚跪奠於案三叩興司琖奉茶琖立
獻於案正中皆退司祝至祝案前跪三叩興奉祝
版跪案左樂暫止贊禮郎贊跪承祭官跪贊讀祝
司祝讀祝辭曰維某年月日

皇帝遣某官某致祭於

真武之神曰茲朕誕辰惟

神永遠默佑謹以茶果庶品之儀致祭尚

饗讀畢興以祝版跪安篚內叩如初興退樂作贊禮

郎贊叩興承祭官行三叩禮興典儀贊行亞獻禮
司琰奉茶琰獻於左如初獻儀退贊行終獻禮奉
茶琰獻於右如亞獻儀退典儀贊送

神贊禮郎贊跪叩興承祭官行三跪九叩禮興典儀
贊奉祝帛送燎司祝司帛詣

神位前咸跪三叩司祝奉祝司帛奉篚興司香跪奉
香興以次恭送燎所承祭官避立拜位西旁俟祝
帛過復位立典儀贊望燎贊禮郎引承祭官詣燎

位視燎贊禮畢樂止引承祭官退執事官皆退

右祀真武廟

祀

司火神之禮歲六月下旬三日遣官一人將事祀日

廟祝潔埽廟宇內外太常寺具祝版備器陳牛一

羊一豕一果實五盤鑪鎰具殿中少西設案北向

供祝版東設一案陳禮神制帛一色尊一爵三香

盤一和聲署設樂於西階下

器

數見祀

真武禮太常寺

設洗於東階下少南設承祭官拜位於殿內正中
司祝司香司帛司爵各立祝案尊案之次典儀立
殿東檐下掌燎率燎人立燎鑪旁承祭官朝服行
三跪九叩禮升降均由東階出入殿左門迎神上
香奠帛讀祝三獻爵送神望燎儀均與祀

真武同

祝辭曰維某年月日

皇帝遣某官某致祭於

司火之神曰惟

神令司赤帝德炳離明屆此良辰爰修專祀鑒茲特
典綏我蒸民尚

饗

樂辭曰離正南方位燭照光九圍粒民火食功用
不違瓘明粢我民所慰履祥霽戢鵠尾息融風
降福禧

右祀火神廟

祀

礮神之禮間二歲季秋朔日於蘆溝橋北席地為壇
遣八旗漢軍都統或副都統將事副都統以下至
佐領咸陪祀豫日地方官備案太常寺具器陳祀
日漢軍弁兵陳八旗礮位於壇內按翼左右序列
皆西向前設八案各設

神位

以紙為之

又前設牲案各陳羊一豕一果實五盤

錢

二十又前設香案各陳鑪一鐙二壇中少北設一

案供祝文左右分設二案各陳香盤四爵十有二
尊四簠勺具設洗於壇外之南太常寺司祝司香
司爵各立祝案尊案之次承祭官位各香案前東
面陪祀副都統以下以其班序重行異等均東面
典儀一人立於壇左掌燎率燎人立燎鑪隅黎明
承祭官暨陪祀官咸補服詣壇贊引太常寺贊禮
郎各二人分引承祭官至盥洗所盥手畢詣各拜
位前立典儀贊執事官各共廼職贊禮郎贊就位

承祭官各就位立典儀贊迎

神贊禮郎贊詣上香位引各旗承祭官分詣各旗礮
位前贊上香司香跪奉香承祭官舉炷香三上瓣
香畢贊復位各引復位立贊跪叩興承祭官行三
跪九叩禮陪祀官均隨行禮典儀贊行初獻禮有
司揭尊幕勺挹酒實爵各進至

神位前奉爵立獻於案正中退司祝詣祝案前跪三
叩興奉祝文跪案左贊禮郎贊跪承祭官暨陪祀

官咸跪典儀贊讀祝司祝讀祝辭曰維某年月日
皇帝遣某官某等致祭於

司礮之神曰惟

神欽

天命而無私助揚威武有功國家茲當秋祭之日特以牲

醴遣官致祭

神其鑒之尚

饗讀畢興奉祝文跪安於鑲黃旗礮位前叩如初興

退贊禮郎贊叩興承祭官暨陪祀官均行三叩禮
典儀贊行亞獻禮司爵各奉爵獻於左如初獻
儀退贊行終獻禮司爵各奉爵獻於右如亞獻儀
退典儀贊送


神贊禮郎贊跪叩興承祭官陪祀官均行三跪九叩
禮典儀贊奉祝文送燎有司各奉

神位在前次祝次香由中道恭送燎所承祭都統各
避立拜位左右俟過復位立贊禮郎贊詣望燎位

引承祭官各詣燎位視燎贊禮畢引承祭官退執
事各官皆退

右祀礮神

欽定大清通禮卷十三



總校官庶吉士

臣

張能照

校對官庶吉士

臣

翟槐

謄錄監生

臣

李華文

欽定四庫全書叢要

史部

欽定大清通禮卷十四

五

詳校官編修臣繆晉



欽定四庫全書薈要卷八千三百四十四

欽定大清通禮卷十四

吉禮

 祭
都城隍神之禮每歲

萬壽聖節遣官一人將事是日廟祝潔掃廟宇內外
太常寺具祝版備器陳牛一羊一豕一果實五盤
鑪一鐙二設案一於殿中少西北向供祝版設案

一於殿東西向陳禮神制帛一色白香盤一尊一爵

三設洗於東階下和聲署設樂於西階上

器數見祀真

武禮承祭官拜位在階上正中太常寺司祝司香司

帛司爵分立祝案尊案之次典儀立殿外東檐下

掌燎率燎人立燎鑪之前均如常儀黎明承祭官

朝服詣廟贊引太常寺贊禮郎二人引承祭官由

左側門入贊盥洗承祭官盥手畢升東階至拜位

前北面立典儀贊執事官各共廼職贊禮郎贊就

位承祭官就位立典儀贊迎

神樂作辭曰佳麗皇都勝保障神力宏萬方輻輳
夜不驚正直聰明瘳彰如影荷靈貺篤其慶固金
甌護玉京贊禮卽贊就上香位引承祭官入殿中
門至香鑪前立贊上香司香跪奉香承祭官上炷
香三上瓣香畢贊復位承祭官復位立贊跪叩興
承祭官行三跪九叩禮興典儀贊奠帛爵行初獻
禮司帛跪獻篚於案三叩興司爵立獻爵於正中

皆退司祝詣祝案前三叩興奉祝版跪案左樂暫
止典儀贊讀祝贊禮郎贊跪承祭官跪司祝讀祝
辭曰維某年月日

皇帝遣某官某致祭於

都城隍之神曰茲朕誕辰惟

神永垂護佑謹以牲醴致祭尚

饗讀畢興奉祝版跪安於篚內叩如初興退樂作贊
禮郎贊叩興承祭官行三叩禮興典儀贊行亞獻

禮司爵奉爵獻於左儀如初獻退典儀贊行終獻
禮司爵奉爵獻於右如亞獻儀退典儀贊送

神贊禮郎贊跪叩興承祭官行三跪九叩禮興典儀
贊奉祝帛送燎司祝司帛詣

神位前咸跪三叩奉祝帛興司香跪奉香興以次送
至燎所承祭官避立拜位西俟祝帛過復位立典
儀贊望燎贊禮郎引承祭官詣望燎位視燎贊禮
畢引承祭官仍由東側門出樂止各退

歲秋諏吉遣官致祭

神位前陳鉶二簋二簋二籩十豆十餘牲帛尊爵饔
飭同前送神時典儀贊徹饌有司乃徹餘均如前
儀

祝辭曰維某年月日

皇帝遣某官某致祭於

都城隍之神曰惟

神正直實贊靈化捍禦之功都邑所賴祇嚴歲祀用

答

神庥尚其歆茲永福黎庶尚

饗

右祭都城隍廟

祭

東嶽神之禮每歲

萬壽聖節遣官一人將事是日廟祝潔掃廟宇內外太
常寺官具祝版備器陳牛一羊一豕一果實五盤

鑪一鐙二殿中少西設案供祝版東設一案陳禮
神制帛一色青香盤一尊一爵三和聲署設樂於西
階上太常寺設洗於東階下少南承祭官拜位在
階上正中司祝司香司帛司爵典儀掌燎各以其
職為位承祭官朝服行禮迎神上香初獻讀祝亞
獻三獻送神望燎儀均與祭

都城隍廟同

祝辭曰維某年月日

皇帝遣某官某致祭於

東嶽泰山之神曰茲朕誕辰惟

神永遠默佑謹以牲醴庶品之儀致祭尚

饗

樂辭曰維嶽崧高五泰岱常祀殊累朝玉檢柴望
始虞木德條風吹萬畢煦宅東寓以生物仰天齊
鑒有孚

右祭東嶽

祭

黑龍潭神之禮歲春秋諏吉遣官一人將事是日太常寺具祝版備器陳羊一豕一簠簋各二籩豆各十鑪鐙具殿中少南設案供祝版北設一案陳禮神制帛一白香盤一尊一爵三和聲署設樂於南階上太常寺設洗於東階下之北承祭官拜位在其階上正中司祝司香司帛司爵典儀掌燎各以其職為位承祭官朝服行禮迎神上香初獻讀祝亞

獻三獻徹饌送神望燎儀均與秋祭

都城隍廟同

祝辭曰維某年月日

皇帝遣某官某致祭於

昭靈沛澤龍王之神曰惟

神德潤生民膏流甸服雨暘時若夙彰孚應之靈年
穀順成溥被盈寧之福念

神庥之丕著惟典祀之宜崇茲值仲春用申報饗尚

其歆格鑒此精誠尚

饗

樂辭曰興雨祁祁應歷歲恩屢覃湫幽神御農扈
具瞻寸合崇朝十千有渰黍膏溥矣麥湛賽神庥
以作甘

右祭黑龍潭龍神

玉泉山龍神祠歲以春秋仲月與

黑龍潭廟同日致祭遣官一人將事太常寺官設祝

案於殿中少西供祝版東設一案陳香帛尊爵設
洗於東階之南和聲署設樂於西階上餘供牲牢
品物遣官行禮儀節及所用樂辭均與祭

黑龍潭龍神同

祝辭曰維某年月日

皇帝遣某官某致祭於

惠濟慈佑龍王之神曰惟

神潤下流膏應時澤物珠泉湧地毓靈脈於山林玉

液成川暢清流於畿甸滋勻勻之繡壤允資灌注
之功通翼翼之漕艘長助輓輸之利聿昭靈貺宜
奉明禋茲值仲春用申報饗尚其歆格鑒此精誠
尚

饗

右祭玉泉山龍神

祭

后土神

司工神之禮凡大興作諏吉遣官各一人將事豫日

工部官於營建所在因其方設左右二壇以織葦

為殿圖績結綵祭日五鼓太常寺官具祝版

祝文翰林

院隨事
撰擬設

神案各一於壇內正中以黃紙書

后土之神

司工之神皆為位供案上各陳羊一豕一餅餌十有
五盤果實五盤鑪鐙具設祝案於中少右供祝版

左設一案陳帛一色香盤一尊一爵三和聲署設
樂太常寺設洗如式司祝司帛司香司爵典儀掌
燎各以其職為位承祭官拜位在壇內香案前正
中贊禮郎引承祭官朝服行禮迎神上香初獻讀
祝亞獻三獻送神望燎均與祭

都城隍廟同

樂辭曰仰眺銀河上閣道如駕梁儼神宅只愉矣
穆將揆日鳴鑾繫神斯掌奠椒酒以禋享荷神庥

澤未央

右祭后土司工

迎吻祭

窰神

門神之禮各遣官一人將事豫日工部官設壇於琉璃窰及迎吻所經之門以織葦為殿圖續結綵祭日五鼓和聲署設樂於各壇前設導迎樂於窰門

外太常寺官具祝版

祝文翰林院隨事撰擬

設

神位陳羊豕餅餌果實香帛尊爵鑪鐙設洗與祭

司工儀同承祭官暨禮部太常寺有職事工部內務
府管工各官咸朝服簪花披紅乃陳吻於案前和
聲署樂作辭曰和氣嘉祥應聖日華耀明仰方泰
紫俯奠泰寧繚廓絃瀛此惟表正食神德蒙神慶
享明禋億萬齡

琉璃案及各門辭同

太常寺贊禮郎引琉璃

案承祭官詣

案神位前行禮引各門承祭官詣

門神位前行禮均與祭

司工儀同祭畢導迎樂作辭曰皇作宮殿因地順天
如竹苞矣美哉輪奐鳥翼飛松栴芽且寧居萬
年鑒儀衛校舁吻禮部太常寺官前導承祭官從
所經諸門承祭官迎於門前及工所管工官列班
恭迎以入俟安吻事竣各退

右迎吻祭窑神門神

歲春秋諏吉祭

司倉神之禮通州祭於大西倉倉塲侍郎主祭各監
督陪祀京倉左翼於海運右翼於興平朝陽門外
於儲濟各以本倉監督主之各監督分行陪祀祀
用羊一豕一果實十盤壺爵鑪鐙具主祭官朝服
質明將事率陪祀官行二跪六叩禮上香三獻爵
燎楮帛如儀退

右祭倉神

欽定大清通禮卷十四

欽定四庫全書薈要卷八十三百四十五

欽定大清通禮卷十五

吉禮

致祭

先醫之禮

景惠殿內中奉

太昊伏羲氏左

炎帝神農氏右

黃帝軒轅氏均南向

勾芒

風后東位西向

祝融

力牧西位東向東廡僦貸季歧伯伯高少師雷公伊
尹淳于意王叔和皇甫謐葛洪韋慈藏錢乙劉完
素李杲皆西向西廡鬼臾區俞跗少俞桐君馬師
皇扁鵲張機華陀巢元方孫思邈王冰朱肱張元

素朱彥修皆東向以北為上歲以春冬仲月上甲
遣官將事豫日太常寺官具祝版眡割牲太醫院
官潔蠲殿廡內外拂拭

神座如儀祀日五鼓太常寺官具器陳正殿

三皇位前各設一案每案銅二簋二簋二籩十豆十共
牛一羊一豕一前設香案各一陳鑪一鐙二配位
東西各設一案每案銅二簋一簋一籩十豆十羊
一豕一鑪一鐙二殿中設一案少西北向供祝版

東設一案西向陳禮神制帛三色香盤三爵九尊

一西設一案東向陳素帛二色香盤二爵六尊一

凡牲陳於俎凡帛實於筐凡尊實酒承以舟疏布

冪勺具東廡分設三案每案簠一簋一籩四豆四

琖十豕肉二統設一案陳鑪一鐙二設案一於南

北向陳素帛一香盤一尊一爵三筐冪勺具西廡

陳設同太常寺官設洗於咸濟東門內和聲署設

樂於西階下

器數見祀
真武禮

承祭官拜位在殿階上讀

祝拜位在殿內正中兩廡太醫院分獻官位甬道
左右太常寺司祝司香司帛司爵分立祝案尊案
之次典儀立殿外東階掌燎率燎人立於燎鑪南
昧爽司祝奉祝版安於祝案承祭官暨分獻官咸
朝服豫埃太醫院鴻臚寺官引陪祀太醫院官入
咸濟門內左右祗埃至時太常寺贊禮郎二人引
承祭官入咸濟東門分獻官隨入贊盥洗承祭官
盥手畢引至拜位前立典儀贊執事官各共廼職

贊禮郎贊就位承祭官暨分獻官陪祀官均就位
立典儀贊迎

神樂作辭曰精氣緣乎理調劑觀所頤曰惟古聖嘗草
定醫似鐵隨磁診除吉至化工出自於指萬姓永
荷恩施贊禮郎引承祭官由殿左門入詣正中香
案前贊跪承祭官跪贊上香司香跪奉香承祭官
上炷香三上瓣香興以次詣左右正位前上香如
儀配位司香官分詣各案前跪上香兩廡贊禮郎

引分獻官分詣兩廡位前上香畢贊復位承祭官
復位兩廡分獻官各復位立贊跪叩興承祭官行
三跪九叩禮分獻官陪祀官均隨行禮興典儀贊
奠帛爵行初獻禮有司揭尊罍勺挹酒實爵司帛
奉篚司爵奉爵以次詣各

神位前司帛跪奠篚於案三叩興司爵立獻爵奠於塾
中畢皆退贊禮郎贊詣讀祝位引承祭官就讀祝
位立司祝至祝案前跪三叩興奉祝版跪案左樂

暫止贊禮郎贊跪承祭官跪分獻官陪祀官咸跪
贊讀祝司祝讀祝辭曰維某年月日

皇帝遣某官某致祭於

太昊伏羲氏

炎帝神農氏

黃帝軒轅氏曰古昔聖人德澤深宏創制醫藥拯濟斯

世仁壽庶民茲當仲春謹以牲醴致祭惟

神慈惠蠲除疾疢篤佑朕躬致和天下配以

勾芒氏之神

祝融氏之神

風后氏之神

力牧氏之神尚

饗讀畢奉祝版跪安

太昊伏羲氏神位前篚內叩如初興退樂作贊禮郎贊
叩興承祭官暨分獻官陪祀官均行三叩禮興贊
復位引承祭官復位立配位及兩廡執事生奠帛

獻爵畢各退典儀贊行亞獻禮正位司爵配位及兩廡執事生各奠爵於左如初獻儀典儀贊行終獻禮正位司爵配位及兩廡執事生各奠爵於右儀如亞獻典儀贊徹饌有司徹畢贊送

神贊禮郎贊跪叩興承祭官分獻官陪祀官均行三跪九叩禮興樂止典儀贊奉祝帛饌送燎有司奉祝帛香饌及兩廡香帛饌以次恭送燎所如儀贊禮郎引分獻官鴻臚寺官引陪祀官皆退承祭官避

立拜位旁西面竢祝帛過復位立典儀贊望燎贊
禮郎引承祭官由咸濟東門出詣燎位視燎贊禮
郎贊禮畢樂止承祭官退執事各官皆退

右祭先醫廟

致祭

闕帝之禮歲以春秋仲月諏吉遣官一人將事是日昧
爽廟祝潔埽殿宇內外太常寺官具祝版備器陳
神位前牛一羊一豕一登一鴈二簋簋各二籩豆各

十鑪一鐙二殿中設一案少西北向供祝版東設

一案陳禮神制帛一色白香盤一尊一爵三牲陳於

俎帛實於篚尊實酒霽勺具和聲署設樂於西階

上

器數見祀真武禮

太常寺設洗於東階上承祭官拜

位在階上正中司祝司香司帛司爵典儀掌燎各

以其職為位如常儀質明承祭官朝服詣廟贊引

太常寺贊禮郎二人引承祭官由廟左門入至東

階上盥手畢引詣拜位前立典儀贊執事官各共

廼職贊禮郎贊就位引承祭官就位立典儀贊迎

神樂作辭曰扶植綱常正浩氣昭日星絕倫獨立英

爽若生俎豆常馨夏夷胥敬仰神德莫疇並助邦

家永太平贊禮郎贊詣上香位引承祭官入殿左

門就香案前立贊上香司香跪奉香承祭官上炷

香三上辦香畢贊復位引承祭官復位立贊跪叩

興承祭官行三跪九叩禮興典儀贊奠帛爵行初

獻禮有司揭尊罍勺挹酒實爵司帛奉篚司爵奉

爵各進至

神位前司帛跪奠篚於案三叩興司爵立獻爵於案
正中各退司祝詣祝案前跪三叩興奉祝版跪案
左樂暫止贊禮郎贊跪承祭官跪典儀贊讀祝司
祝讀祝辭曰維某年月日

皇帝遣某官某致祭於

闕帝之神曰惟

神秀毓河山名垂今古英風正氣世歷久而彌新大

節純心史相傳而莫匹念神靈之顯著命典禮以

優隆茲當仲

春秋

用昭時饗尚其歆格鑒此精虔尚

饗讀畢興以祝版跪安於筐內叩如初興退贊禮郎

贊叩興承祭官行三叩禮興典儀贊行亞獻禮司

爵獻爵於左贊行終獻禮司爵獻爵於右均如初

儀典儀贊徹饌有司徹畢贊送

神贊禮郎贊跪叩興承祭官行三跪九叩禮興樂止

典儀贊奉祝帛饌送燎有司奉祝帛香饌以次送

燎如儀贊望燎贊禮郎引承祭官詣燎位視燎禮
畢樂止承祭官及執事官皆退

同日祭後殿以太常寺卿一人將事

光昭公位中

裕昌公左

成忠公右均南向位各異案每案羊一豕一鉶二簋
簋各二籩豆各八鑪一鐙二殿中設案少西北向
供祝版東西各設一案分陳禮神制帛三色香盤

三爵九尊三俎篚簠勺具設洗於後垣門內甬道
東承祭官位殿檐下正中司祝司香司帛司爵典
儀掌燎各以其職為位如常儀質明承祭官由前
左門入後垣中門盥手升階就位迎神引詣正位
前上香畢以次詣左右位前上香復位行二跪六
叩禮初獻讀祝如儀祝辭曰維某年月日

皇帝遣某官某致祭於

闕帝之

曾祖光昭公

祖裕昌公

父成忠公曰惟

公盛德相承令儀足式歷數傳之積累遂鍾河嶽精
靈儲曠代之威名堪作巖廊矩矱殊恩既沛於三
世時饗宜錫於上公茲當仲春用昭祀事豆籩致
潔典禮加隆尚

饗凡儀節均與前殿同

右春秋祭闕帝廟

歲五月旬有三日致祭

闕帝廟前殿

神位前陳牛一羊一豕一果實五盤鑪鍤具陳設及
行禮儀節與春秋祭同

祝辭曰維某年月日

皇帝遣某官某致祭於

闕帝之神白惟

神純心取義亮節成仁允文允武乃聖乃神功高當
世德被生民兩儀正氣歷代明禋英靈丕著封號
聿新敬修歲事顯佑千春尚

饗

同日並祭後殿太常寺卿一人行禮每案羊一豕
一果實五盤典儀不贊徹饌司爵以執事生餘陳
設及行禮儀節與春秋祭同

祝辭曰維某年月日

皇帝遣某官某致祭於

闕帝之

曾祖光昭公

祖裕昌公

父成忠公曰禮隆報祀誼重推恩當崧生嶽降之期
溯木本水源之始輝煌棟宇憑依已妥於上公修
潔豆籩將饗告虔於仲夏惟

神照鑒尚其歆格

右五月十三日祭關帝廟

直省府州縣

關帝廟歲均以春秋仲月及五月旬有三日致祭前
殿主祭以地方正官一人後殿以丞史執事以禮
生祭日陳設迎神上香奠獻讀祝送神視燎禮儀
並與

京師祭前後殿同

前殿祝辭曰維某年月日某官某致祭於

關帝之神曰惟

帝浩氣凌霄丹心貫日扶正統而彰信義威震九州
完大節以篤忠貞名高三國

神明如在徧祠宇於寰區靈應丕昭薦馨香於歷代
屢徵異蹟顯佑羣生恭值仲春秋嘉辰遵行祀典筵
陳籩豆几奠牲醪尚

饗

後殿祝辭曰維某年月日某官某致祭於

闕帝之

曾祖光昭公

祖裕昌公

父成忠公曰惟

公世澤貽庥靈源積慶德能昌後篤生神武之英善
則歸親宜享尊崇之報列上公之封爵

錫命優隆合三世之肇禋典章明備恭逢仲春秋諏吉祇

事薦馨尚

饗

右直省府州縣祭關帝廟

直省禦災捍患諸神於民有功德者加

封號立專祠祭

英衛公伍員於錢塘

通祐王李冰於灌

安瀾之神張巡於浮梁

誠應武肅王錢鏐於臨安

顯佑通濟王謝緒於宿遷

靜安公張夏於蕭山

寧江伯湯紹恩於紹興

寧漕公宋禮

永濟之神白英於汶上致祭之禮每歲春秋所在守

土官具祝文

各隨時撰擬

香帛羊一豕一尊一爵三陳

設祠內如式質明守土正官一人朝服詣祠行禮

儀節與直省祭

關帝廟同

右祭直省所在有功德於民神祠

前代聖賢名臣忠烈祠墓暨

本朝開國勲臣墳墓恭逢

皇帝時巡方嶽離

御道三十里內者遣官致奠前期翰林院具祝文

隨時隨人

擬撰

太常寺備香帛授遣官齋往祭日守土官於祭

所設洗備脯醢果實七盤

品物各隨其土產

鑪鐙具左設

一案供祝文右設一案陳香盤一帛一尊一爵三通贊一人引贊二人司祝香帛爵各一人以所在禮生充黎明遣官朝服至所祭地引贊引詣盥洗所盥手畢通贊贊執事者各司其事引贊贊就位引遣官詣拜位前立通贊贊迎神引贊引遣官詣香案前司香奉香跪於左引贊贊上香遣官上香如常儀贊復位遣官退復位贊跪叩興遣官行二跪六叩禮興通贊贊奠帛爵行初獻禮司帛獻篚

司爵獻爵如常儀贊讀祝司祝奉祝文立案左宣
讀訖安於篚內退亞獻終獻均如初儀通贊贊送
神引贊贊跪叩興遣官行二跪六叩禮興通贊贊
奉祝帛送燎執事者各奉祝帛香以次送燎通贊
贊望燎引贊引遣官詣燎鑪前視燎禮畢引遣官
退執事者皆退

右時巡遣祭聖賢忠烈名臣勲臣祠墓
祭

賢良祠之禮前室祀宗室親王以下貝勒貝子以
上後室祀公侯伯以下一二品大臣以上均按代
序官同代同官序其年月位均南向歲春秋仲月
諏吉前室遣官一人致祭後室以太常寺卿一人
將事所祀王子孫咸與行禮大臣子孫通籍在京
者如之祭之日太常寺官入祠供具前室異案各
羊一豕一果實五盤鑪一鐙二中設一案少東北
向供祝版西設一案東向陳香盤二尊二爵六素

帛二色白後室五案共羊一豕一每案果實五盤鑪

鐙具東設一案西向陳香盤一尊一爵三素帛一
凡牲陳於俎帛實於篚尊實酒霽勺具設洗於前
室東階下前後各設燎鑪於垣門內東南隅漏未
盡與祭者各服其服畢集於祠垣門內太常寺典
儀立前室檻外之東司祝立祝案東司香司帛司
爵各以其職為位掌燎率燎人立燎鑪前實明承
祭官朝服詣祠贊禮郎二人引前室承祭官由中

門入又二人引後室承祭官隨入各至東階下盥
手畢升階就拜位前立鴻臚寺官引王以下子孫
序立於前室甬道左右引公以下大臣子孫序立
於後室庭中左右均北面典儀贊執事官各共廼
職贊禮郎贊就位承祭官以下咸就位贊上香前
室承祭官詣正中香案前立司香跪奉香承祭官
上炷香三上瓣香次詣各香案前上香如儀贊復
位承祭官復位贊跪叩興承祭官暨陪祀官均行

二跪六叩禮興後室承祭官同時詣中案前上香

儀同

凡儀節後室均隨前室唱贊行禮

典儀贊奠帛爵行初獻禮

有司揭尊罍勺挹酒實爵司帛奉篚詣案前跪奠於案三叩興司爵奉爵立獻正中皆退前室後室同司祝詣祝案前跪三叩興奉祝版立案右典儀贊讀祝司祝北面宣讀承祭官立聽陪祀官皆跪聽辭曰維某年月日

皇帝遣某官某

諭祭賢良祠王大臣等之靈曰功銘鐘鼎尚書崇元祀
之文德冠巖廊周禮著大猷之典蓋旗常載績本臣
子之素懷而俎豆薦馨乃朝廷之崇報爾親王等望
重親賢粹鍾川嶽竭忠誠而體國著勲德於當年大
臣等或當

列祖開基之日佐命立功或際熙朝極盛之時宣猷贊化
或驅除暴亂定疆宇於域中或震耀聲靈收版圖於
海外內則台星卿月奏亮工熙載之勲外則賜鉞授

麾襄阜物安民之治老成謀國者進黃髮之嘉猷清
白持身者表素絲之高節純勤盡職則夙夜匪躬密
勿承休則堂廉一德我

皇考追思前蹟特煥褒綸崇廟宇於神京布几筵而時祭
益以表揚既往沛酬庸褒德之恩激勸將來勵懷古
欽風之志朕寅承丕基嗣舉舊章撫節物以懷賢潔
牲牢而致享英靈如在尚克歆承讀訖司祝以祝版
安於中案篚內跪三叩興退陪祀官三叩興典儀

贊行亞獻禮司爵奉爵奠於左贊行終獻禮司爵
奉爵奠於右均如初儀贊禮郎贊跪叩興承祭官
暨陪祀官均行二跪六叩禮興典儀贊奉祝帛送
燎司祝司帛司香奉祝帛香以次送燎如儀承祭
官避立西旁俟過復位典儀贊望燎陪祀官退贊
禮郎各引承祭官分詣燎位視燎贊禮畢仍引由
中門出各退

右祭京師賢良祠

直省會城歲春秋仲月祭守土有功德大吏於賢
良祠祭日視

京師以知府一人主之教授教諭訓導等官執事祭
品用羊一豕一果實五盤帛一尊爵鑪鐙具主祭
官上香奠帛三獻行禮儀均與直省祭忠孝節義
祠同祝辭曰維某年月日某官某致祭於

賢良之靈曰惟

靈文武憲邦公忠體國當

皇朝之肇造心膺攸同值

列聖之丕承股肱作輔明良合德奮庸而庶績咸熙中外
宣猷敷澤而兆民永賴洵屬廟廊之碩望允宜俎
豆以明禋考績紀勲崇報昭垂於令典陳牲奠幣
馨香祇薦於歲時尚

饗

右祭直省賢良祠

京師功臣專祠歲以春秋仲月諏吉遣太常寺卿分

詣致祭祭

定南武壯王之禮祠內一案以福晉配祭日太常
寺官入祠具器陳羊一豕一果實五盤鑪一鐙二
中設一案少東陳祝文東設一案陳尊一香盤一
素白三爵九設洗於祠門內之東司祝司香司帛
司爵典儀掌燎各以其職為位如常儀質明承祭
官朝服詣祠贊禮郎二人引自中門入盥手畢升
階詣拜位前立典儀贊執事官各共廼職贊禮郎

贊就位承祭官就位立贊禮郎引承祭官詣香案
前贊上香司香跪奉香承祭官上炷香三上鞭香
畢贊復位承祭官復位贊跪叩興承祭官行二跪
六叩禮興典儀贊奠帛爵行初獻禮司帛奉篚司
爵奉爵各奠於案如常儀退司祝至祝案前跪三
叩興奉祝文立案右北面宣讀辭曰維某年月日
皇帝遣某官某

諭祭於定南武壯王孔有德之靈曰人臣進忠仗節矢

天日而不渝朝廷恤死酬勲撫歲時而增感爾定南

武壯王孔有德膚功早著偉烈常存茲當仲

春秋

之辰

益念忠良之績特頒祭典用慰幽靈王如有知尚克
歆饗讀訖以祝文安於篚內跪叩如初興退典儀贊

亞獻司爵獻爵於左贊終獻司爵獻爵於右均如

初儀贊禮郎贊跪叩興承祭官行二跪六叩禮典

儀贊奉祝帛送燎司祝司香司帛奉祝帛香以次

送燎如儀承祭官避立拜位西旁俟過復位立典

儀贊望燎贊禮郎引承祭官詣燎鑪前視燎贊禮
畢仍引由中門出退

右祭定南武壯王

歲春秋祭

恪僖公之禮祠內一案以夫人配祭日用素帛二
爵六餘陳設及行禮儀節與

定南武壯王同

祝辭曰維某年月日

皇帝遣某官某

諭祭於恪僖公過必隆之靈曰沛隆恩於勲舊國有彝
章展時祭於春秋禮踰常格爾恪僖公過必隆名垂
青簡績著豐碑追椒寢於所生宜專祀以有永茲當
春秋仲申侑几筵靈如有知尚克歆饗

右祭恪僖公

歲春秋祭

勤襄公之禮祠內三案勤襄公佟圖賴居中忠勇

公佟國綱左端純公佟國維右各以夫人配祭日
每案羊一豕一果實五盤鑪一鐙二東西各設一
案分陳香盞三素帛七爵二十有一尊三承祭官
朝服詣祠就位以次至各案前上香畢復位行禮
儀節均與祭定南武壯王同

祝辭曰維某年月日

皇帝遣某官某

諭祭於勤襄公佟圖賴忠勇公佟國綱端純公佟國維

之靈曰崇功報德禮首逮於元臣錫類推恩誼尤敦
於懿戚考彞章而立廟因時序以薦觴惟爾一門宣
猷累葉效忠貞而體國名著旂常秉孝義以型家芳
傳國史望高閭閻蔚為勲舊之宗慶衍庭帟光啟
聖慈之範茲當春秋仲特遣專官設奠几筵靈其歆饗

右祭勤襄公

歲春秋祭

文襄公之禮祠內一案以夫人配祭日用素帛三

爵九餘陳設及行禮儀節與

定南武壯王同

祝辭曰維某年月日

皇帝遣某官某

諭祭於文襄公圖海之靈曰義重酬勲眷鈞衡之舊德
禮隆秩祀因節序以申恩爾文襄公圖海望高國器
功贊王猷表世德於戟門生膺第祿贈崇階於鼎爵
歿被榮名渙新綽而建祠遣專官而致祭時當春秋仲

式布几筵靈其有知尚能歆格

右祭文襄公

歲春秋祭

宏毅公之禮祠內一案祭日用素帛一爵三餘陳
設及行禮儀節與

定南武壯王同

祝辭曰維某年月日

皇帝遣某官某

諭祭於宏毅公額宜都巴圖魯之靈曰誼重酬庸茂典
聿加於勲舊禮隆展祀歲時宜備於馨香爾宏毅公
額宜都巴圖魯開國名臣從龍上佐表成勞於鐘鼎
青史揚芬紀綿績於旂常豐碑示寵既叨恩於廟室
更賜祭於專祠式賁新綸允符彝憲時當仲春用布秋
几筵靈而有知尚其歆格

右祭宏毅公

歲春秋祭

恪僖公之禮祠內三案恪僖公哈世屯居中敏果
公米思翰左莊愨公李榮保右各以夫人配祭日
陳設行禮儀節與

勤襄公同

祝辭曰維某年月日

皇帝遣某官某

諭祭於恪僖公哈世屯敏果公米思翰莊愨公李榮保
之靈曰禮隆念舊千秋之俎豆攸光義重酬庸奕代

之馨香勿替考彞章而秩祀因時序以申恩惟爾一
門夙稱望族忠誠體國數傳紀績於旂常端敬型家
累葉垂芳於圖史祥開坤極早錫榮封佑啟勲賢復
新廟貌命祠官而陳芬苾落成已賁恩綸隨節候而
展几筵歲薦彌昭懿典茲春秋仲常祀聿修靈如有知
尚其歆格

右祭恪僖公

祭

盛京賢王祠之禮正殿設三案中案奉通達郡王雅爾哈齊武功郡王禮敦慧哲郡王額爾袞左案奉宣獻郡王濟堪禮烈親王代善饒餘親王阿巴泰右案奉鄭簡親王濟爾哈朗穎毅親王薩哈廉怡賢親王允祥位均南向每案羊一豕一果實五盤鑪鐙具殿中少東設案一陳祝文東設一案陳尊九素帛九爵二十有七歲春秋季月以奉天府尹承祭讀祝贊禮暨執事官以

盛京禮部贊禮郎充餘行禮儀節均與

京師賢良祠同

祝辭曰維某年月日

皇帝遣某官某

諭祭於通達郡王武功郡王慧哲郡王宣獻郡王禮烈
親王饒餘親王鄭簡親王穎毅親王怡賢親王之靈
曰功推元祀懿親光翊贊之勲禮重專祠時祭稱褒
崇之典溯謨猷而長在申禋祀以彌加惟王等川嶽

鍾英親賢備美當

列祖開基之日丕奮忠勤緬舊邦佐命之勞適昭來許恩
垂帶礪既錫祉於銀潢績煥旂常亦揚芬於玉冊新
祠肇建懿典攸崇褒德酬庸篤念風雲之會感時撫
序式憑俎豆之馨茲以仲春用申告祭靈其不昧尚
克歆承

右祭盛京賢王祠

祭

昭忠祠之禮凡親王郡王貝勒貝子公侯伯大學士內大臣尚書都統將軍總督一品子爵前鋒統領護軍統領侍郎巡撫副都統二品男爵三品京卿提督總兵官及武職加贈至正從一品等官各奉安於前室位均南向凡四品卿翰林學士布政使按察使一等侍衛叅領輕車都尉及武二品之副將等官奉安於後正室凡五品少卿二等侍衛道府佐領騎都尉及武三品之參將遊擊等官奉

安於後左室凡侍講侍讀御史郎中員外郎主事
三等侍衛雲騎尉及武四品之都司等官奉安於
後右室位均南向凡同知知州通判驍騎等校及
武五品之守備等官奉安於前東配室凡知縣筆
帖式州同縣佐以下及武六品之千把總等官奉
安於前西配室東位西向西位東向配室左右及
前廡東西羣房凡陣亡士卒以其名祔歲春秋仲
月諏吉遣大臣一人詣前室致祭太常寺官十有

三人各分獻所祀王公子孫暨諸臣子孫在京師

者咸與行禮祭之日太常寺官入祠供具前室七

案中室羊一豕一果實五盤左三案各果實五盤

共羊一豕一右如之中左右各香案一鑪一鐙二

後正室五案後左右室各三案每案果實五盤共

羊一豕一爵三

中案奠獻餘爵實酒
豫設配室及房廡同

每室統香案

一鑪鐙具東西配室各五案陳設如之前廡及後

東西羣房每案果實二盤豕肉一爵三鑪鐙具前

室中設一案少東北向供祝版東西序設案分陳香帛尊虛爵後室及前配室左右房廡分陳香帛

房廡不設帛

尊虛爵如儀漏未盡與祭者各服其服畢

集祠門內太常寺典儀立室東檐下司祝立祝案東司香司帛司爵各以其職為位掌燎率燎人立燎鑪前質明承祭官暨分獻官朝服詣祠贊禮郎引承祭官由中門入至東階下盥手畢升階就拜位前立引後室分獻官各於中檻外序立引前配

室及房廡各分獻官於甬道上東西序立鴻臚寺
官引陪祀宗室王公及大臣官并後裔見任一品
二品者於階上東西三品以下五品以上於階下
東西六品以下及有職者在大門內階下東西按
班序立典儀贊執事官各共迺職贊禮郎贊就位
承祭官就位贊禮郎引由前室中門入詣香案前
立贊上香司香跪奉香承祭官上炷香三上鞭香
以次詣左右香案前上香如儀贊復位承祭官復

位贊跪叩興承祭官分獻官暨與祭者均行二跪
六叩禮興典儀贊奠帛爵行初獻禮前室司帛奉
篚各奠於案三叩興司爵奉爵各奠於正中皆退
同時後室東西配室房廡分獻官分詣各香案前
上香如儀執事生獻帛於案司爵獻爵中案正中
退司祝詣祝案前跪三叩興奉祝版立案右典儀
贊讀祝司祝北面宣讀承祭官及分獻官立聽與
祭者跪聽辭曰維某年月日

皇帝遣某官某

諭祭八旗直省盡節立功王大臣等之靈曰周禮有司
勲之職名勒旂常祭法載勤事之文先生俎豆蓋舍
生取義臣子抒報國之忱而報德酬庸朝廷示作忠
之典英標如在渥澤宜頒爾王大臣等丹心自勵正
氣挺生果敢本於性成見危授命忠誠矢於敵愾視
死如歸生當開創之年執銳披堅實賴干城之佐運
際承平之日安邊除暴亦資禦侮之才或陷陣以爭

先或守土而盡職或被誘不辱乃授首以從容或深入無援遂致身於倉卒雖天戈所指如振槁而摧枯乃大義為昭可凌霄而貫日我

皇考軫懷曩烈誕賁殊榮命立專祠俾膺特典王公將帥躋正宇之輝煌士卒偏裨列兩廡而陪侍蓋所以表忠貞於既往昭義節於無窮朕洪紹丕基遵循常祀恭書竹帛既揚久遠之芳徽禮薦牲牢勿替春秋之血食苾芬在烈靈爽歆承讀訖以祝版奉安於中案

篚內跪叩如初興退與祭者咸三叩興亞獻終獻
均如初儀贊禮郎贊跪叩興承祭官分獻官及與
祭者均行二跪六叩禮典儀贊奉祝帛送燎有司
奉祝帛香以次送燎承祭官視燎均如祭

賢良祠之儀

右祭昭忠祠

祭

雙忠祠之禮歲春秋仲月遣官一人將事是日太

常寺官具祝版備器陳龕位前統設一案陳羊一豕一果實五盤鑪鐙具設案於祠內正中少東供祝版東設一案陳素帛二香盤一尊一爵六設洗於東階下之南承祭官拜位在香案前正中司祝司香司帛司爵典儀掌燎各以其職為位質明承祭官朝服詣祠行禮儀節與祭

昭忠祠同

祝辭曰維某年月日

皇帝遣某官某

諭祭於襄烈伯傳清壯果伯拉布敦之靈曰臣子効匪躬之節報禮斯隆國家昭異數之恩褒忠罔替旣旂常之永勒宜俎豆之世延惓撫流光長懷往績爾襄烈伯傳清壯果伯拉布敦共矢精誠同宣義烈捐生絕塞已銘殊績於鐘鏞晉爵崇階用妥貞魂於廟食茲當春秋仲爰命祠官載考彝章聿修秩祀馨香申薦歷日月以如新琬琰揚芳與山河而共久爾靈不昧

尚克歆承

右祭雙忠祠

歲春秋祭西征陣亡將士於蘭州忠勇祠守土官
一人主祭丞史二人分獻執事以禮生充正祠祀
諸將帥案各果實五盤素帛一尊一爵三鑪一鐙
二共羊一豕一兩廡祀諸軍卒案各果實二盤豕
肉一尊一爵三鑪鐙具祭之日所司備祝文具牲牢
品物守土官朝服詣祠行三獻禮儀與直省祭忠

孝節義祠同

右祭忠勇祠

直省府州縣歲三月寒食節七月望日十月朔日
祭厲壇於城北郊前期守土官飭所司具香燭公
服詣

神祇壇以祭厲告本境

城隍之位上香跪三叩興退至日所司陳羊三豕三
米飯三石尊酒楮帛於祭所設燎鑪於壇南黎明

禮生奉請

城隍神位入壇設於正中香案一鑪銓具贊禮生二人引守土官公服詣

神位前贊跪守土官跪贊上香守土官三上香贊叩興守土官三叩興退執事者焚楮帛守土官詣燎鑪前祭酒三爵退禮生仍奉


城隍神位還

神祇壇退

右直省祭厲附



欽定大清通禮卷十五



總校官庶吉士

臣

張能照

校對官庶吉士

臣

翟槐

謄錄監生

臣

李華文

欽定四庫全書薈要

史部

欽定大清通禮卷十六

七

詳校官編修臣繆晉



欽定四庫全書薈要卷八千三百四十六

欽定大清通禮卷十六

吉禮



親王世子郡王家祭之禮立廟七間中五間為堂左右二間隔以牆為夾室堂後楣以北五室中奉始封之王世世不祧高曾祖禰依世次為二昭二穆昭東穆西親盡則祧由昭祧者藏主於東夾室升昭之二位於一室以二室奉升祧之主由穆祧

者藏主於西夾室升祔亦如之庭繚以垣南為中門又南為廟門左右各設側門庭東西廡各三間東藏遺衣冠西藏祭器樂器廟重檐丹楹采楸綠瓦紅堊壁階祀三出陛門繪五色花草出陛如之焚帛鑪在中門之內庭東南隅刲牲房在中門之外西向歲以四時仲月諏吉祭其始封祖及高曾祖禰五世仲春之祭並出祧主合食

右廟制祭期

合食之禮既擇日徧告在廟所出子孫成人以上者屆期會行禮府屬官僚咸陪祭先三日戒子弟屬官有執事於廟者讀祝一人通贊一人引贊一人職盥一人掌燎一人職拜褥二人以屬官為之奉香每案一人奉帛每案一人奉爵每位一人以子孫為之主人齋於外寢陪祭執事者咸致齋

右戒執事齋

祭前一日執事者入廟埽除拂拭主人盛服率執

事詣廟引贊引主人入自東門

執事者隨入

升東階入

堂左門北面視設神案堂中始封祖專案正位南向左東夾祧主共案東位西向右西夾祧主共案西位東向左次二昭共案東位西向右次二穆共案西位東向堂中少西設祝案一北向東序設香帛案一尊案一均西向設盥於東階上既備引贊引主人降詣庭東廊下展樂器祭器閱祭文詣封牲所視殺牲畢由廟東門出各退

右閱祭器視割牲

祀日昧爽廟中然炬明鐙主人率陪祭者執事者

咸朝服

未仕者咸服

入執事者入堂左門具器陳每案

羊一豕一鉶二簋二籩二簋八豆八

器未備者代以盤碗時物

隨鑪一鐙二每位七一箸二祝陳祝文於祝案職

香帛爵者陳香盤五尊五帛每位各一爵每位各

三於負序東案上陳胙盤於爵北實帛於篚實酒

於尊實水於盥盆加巾樂工陳樂於西階上

樂六器工

六主人位堂檐內正中北面與祭伯叔以上尊行
位東階上兄弟子孫位東階下以世為差世以齒
為序官屬位西階下以爵為序北面祝立祝案西
東面職香帛爵者序立尊案之東西面樂工立西
階上北面通贊立堂門外東楹前職盥者立盥所
燎人立燎鑪隅

右陳設序位

質明子弟之長者二人詣始祖室前啟室奉請神

主又四人分詣東西夾室昭穆室前各奉請神主
安設於几皆昭位考右妣左穆位考左妣右跪一
叩興各退就原位立職拜褥二人布褥於主人拜
位前通贊贊職事者各司其事引贊引主人陟東
階至盥洗所盥手畢通贊贊就位引贊引主人就
拜位立子弟屬官各就位立通贊贊迎神職香者
奉香盤進樂作引贊引主人詣始祖位前贊跪主
人跪贊上香職香者跪奉香主人三上香興以次

詣左右祧位左右昭穆位前上香畢復位贊叩興
主人宗族屬官行二跪六叩禮興樂止通贊贊奠
帛爵行初獻禮樂作執事者揭尊罍勺挹酒實爵
職帛者奉帛職爵者奉爵以次詣各神位前奠篚
於案南獻爵於案北正中畢皆退樂暫止祝者至
祝案前跪奉祭文竣案左引贊贊跪主人跪陪祭
者皆跪贊讀祝祝讀祝畢興奉祭文奠於始祖案
前帛篚內退樂作贊叩興主人率陪祭者三叩興

樂止通贊贊行亞獻禮職爵者奉爵各獻於左如

初儀贊行終獻禮奉爵各獻於右如亞獻儀既終

獻引贊引主人詣始封祖位前奉福胙二人

以正位前

職帛爵者供事

取胙槃詣始祖案前一抄簋簋之實於槃

一取案北正中爵退至主人右跪俟接福胙二人

跪俟於左

以職拜褥者供事

贊跪主人跪右執事進爵主

人受爵拱舉以授左執事進胙受胙亦如之畢執

事者各退贊叩興主人三叩興退復位通贊贊徹

饌辭神樂作執事者徹畢引贊贊叩興主人率陪

祭者行二跪六叩禮興樂止通贊贊奉祝帛送燎

執事者跪奉祝帛香興祝前香帛後以次由堂中

門出送燎所主人避立拜位旁東面

職拜褥者徹褥

俟過

復位與祭尊屬降階立庭東西東西面通贊贊望

燎引贊引主人降自東階詣燎位東面視燎畢告

禮成主人退就庭東立子弟之長者各詣神位前

奉主還室跪三叩闔室退執事者潔滌祭器謹藏

之主人率陪祭執事者咸退乃分胙徧頒於族屬
右行禮

時祭之禮堂中設五案始祖考妣正位南向高曾
祖禰依昭穆為左右與合食同均南向屆日陳設
每案專牲羊一豕一餘牲帛器數及禮節並與合
食儀同

右時祭

時節致薦先一日潔備品物屆日主人夙興率子

弟盛服入廟埽除堂宇於始祖暨四親室前設案
每案果六槃時羞六槃香槃一每位箸二棧三鑪
鐙具陳設畢子弟之長者分詣各神位前啟室主
人以次詣各案前跪上香三叩子弟取壺注酒於
棧徧獻一巡主人就拜位前行二跪六叩禮子弟
少後隨行禮畢乃徹果饌闔室各退

右時節薦新

因事致告屆日夙興入廟啟室薦果槃四庶羞四

主人上香子弟酌酒獻酒及行禮儀注並同薦新儀

右因事告廟

月朔日及望日謁廟禮節與致告同東西夾室祧位前每月朔望主人就室前啟室上香二跪六叩子弟獻酒隨行禮如前儀畢闔室退

右朔望行禮

貝勒貝子宗室公家祭之禮立廟五間中三間為

堂後楣以北分五室奉始封祖暨高曾祖禰兩旁
為夾室奉始封而下親盡祧主如前位廟及大門
均綠瓦紅堊壁階五級廟不重檐門不備采餘如
前制合食始祖專案專牲羊一豕一東夾室祧主
暨二昭專案共牲羊一豕一西夾室祧主暨二穆
亦如之時祭皆專案二昭同牲二穆同牲視親王
籩豆各減二不用樂行禮皆一跪三叩餘儀與親
王同時節則薦果槃四時羞槃四有事則告朔望

則參果盤二庶羞盤二薦獻儀節均與親王同

右貝勒貝子公家祭

品官家祭之禮於居室之東立家廟一品至三品官廟五間中三間為堂左右各一間隔以牆北為夾室南為房堂南檐三門房南檐各一門階五級庭東西廡各三間東藏遺衣物西藏祭器庭繚以垣南為中門又南為外門左右各設側門四品至七品官廟三間中為堂左右為夾室為房階二級

東西廡各一間餘制與三品以上同

世爵公侯伯
子視一品男

以下按品
為差等

八九品廟三間中廣左右狹階一級堂

及垣皆一門庭無廡以篋分藏遺衣物祭器陳於

東西房餘與七品以上同

在籍進士舉人視七品
恩拔歲副貢生視九品

堂後楣北設四室奉高曾祖禰四世皆昭左穆右

妣以適配南向高祖以上親盡則祧由昭祧者藏

主於東夾室由穆祧者藏主於西夾室遷室祔廟

均依昭穆之次東序西序為祔位伯叔祖之成人

無後者伯叔父之成人無後及其長殤十六歲至十九者

兄弟成人無後及其長殤十二歲至十五者妻先歿

者子姓成人無後及其長殤中殤下殤九歲至十一者

皆以版按行輩墨書男統於東女統於西東西向

歲以春夏秋冬仲月擇吉致祭戒子弟讀祝一人

贊禮一人執爵每案二人分薦祔位東西各一人

凡在廟所出子孫年及冠以上者皆會行禮

右廟制祭期

先祭三日主人及在事者咸致齋前一日主人率子弟咸服入廟視潔除拂拭畢執事者於各室前設几几前供案堂南總香案一鑪擎具祔位東西各統設一案設祝案於香案之西設尊爵案於東序設盥槃於東階上視割牲一品至三品官羊一豕一四品至七品特豕八品以下豚肩不特殺視滌祭器三品以上每案俎二鉶二敦二籩六豆六七品以上籩四豆四八品以下籩二豆二皆俎一

鉶敦數同

代以時用
槃斲者聽

辦祭器之實俎實牲體鉶實

羹敦實飯籩實時果餅餌魚腊獸腊之屬豆實炙

載時蔬之屬

右致齋具牲饌

屆日五鼓主人朝服與祭執事者盛服入廟主人
族於東階下族姓族庭東西以昭穆世次為序執

事者陳鑪鎗於供案南陳尊爵於東序案

代以壺
琖者聽

陳祭文於祝案實水於盥槃加巾主婦率諸婦盛

服入詣爨所視烹飪羹定入於東房治籩豆之實
陳鉶敦匕箸醯醬以俟質明子弟之長者盥詣各
室前跪一叩興啟室奉主以次設於几昭位考右
妣左穆位考左妣右分薦者設東西祔位畢贊禮
立堂東檐下西面諸執事分立東西序端相向贊
就位主人升自東階盥詣中檐拜位立族姓行尊
者立於東西階上卑者立於階下皆重行北面贊
叅神主人入堂左門詣香案前跪執事二人

司爵者充

一奉香槃一挹尊酌酒詣主人左右跪左進香主人三上香右進爵主人酌酒於地以爵奠於案興退出右門復拜位及族姓行一跪三叩禮贊初獻主婦率諸婦出於房薦匕箸醢醬於几前案北跪一叩興徧及祔位退入於房庖人解牲體實於俎執事者奉以升各薦於供案主人詣高祖考案前執爵者奉爵主人獻爵奠於正中跪叩興以次詣曾祖祖禰案前獻爵如前儀分薦者徧獻祔位酒

訖退立於拜位贊讀祭文主人跪族姓皆跪祝詣
祝案之左跪讀祭文曰維某年月日孝孫某謹告

於某考某官府君某妣某氏之靈曰氣序流易時

維仲

春夏
秋冬

追感歲時不勝永慕謹以潔牲庶品菜

盛醴齊敬薦歲事以某親某氏等祔食尚饗讀訖

興以祭文復於案退主人以下一叩興贊亞獻庖

人納羹飯於東房主婦率諸婦和羹實於鉶實飯

於敦出薦於案及腊肉炙載徧跪叩興退如初禮

主人獻爵於各位之左贊三獻主婦率諸婦出於房薦餅餌果蔬叩退主人獻爵於各位之右分薦者徧獻祔位酒均如初獻儀贊受嘏祝取高祖供案酒饌降至香案旁主人詣香案前跪祝代祖考致嘏於主人主人啐酒嘗食反器於祝接以興主人一叩興復位贊送神主人以下一跪三叩贊望燎祝取祭文由中門出送燎主人退避東階下行輩長者咸降階主人詣燎位視燎畢與祭者出主

人率子弟納神主上香行禮徹祭器傳於燕器潔
滌謹藏之闔門各退

右祭儀

日中乃餽三品以上時祭徧舉四品至七品春秋
二舉八品九品春一舉庖人熟酒饌僕人布餽席
於堂東西北上陳醯醬於席四隅棧櫟匙箸之屬
皆辦與祭者尊卑咸在從曾祖諸父居東第一席
從祖諸父居西第一席諸父次東一席諸昆弟次

西一席諸子諸孫在東西之末各一席序定主人
肅尊者入席從曾祖諸父即席從祖諸父東向尊
者肅揖就位諸父東向揖西向揖就位諸昆弟揖
如之復揖諸父就位諸子揖如諸父復揖諸昆弟
諸孫揖如諸子復揖諸子皆就位主人離席僕執
壺實酒從主人酌諸尊長酒每酌一人肅揖尊長
答揖徧就位子弟之長者離席僕人執壺從敬酌
主人諸子弟咸避席揖主人答揖復位主人命諸

子弟徧酌酒席中少者舉壺各酌於其長者既徧
皆坐主人興舉酒請於尊長坐尊長乃嘗酒卒爵
衆嘗酒卒爵僕人進食主人興請於尊長坐尊長
舉箸嘗食乃皆食每進食子弟間行酒三巡長幼
獻酬交錯飲無算爵湯飯畢長者起主人請留長
者告飽遂離席諸子弟咸隨離席以次出主人送
長者於門外入命徹席餽庖人僕人皆盡

右餞

焚黃告祭之禮

制書至主人以黃紙恭謄一通奉於廳事正中諏吉日
擇同姓或戚屬已仕者一人宣

制戒子弟引贊二人通贊二人徧戒族姓屆期會行禮
前一日齋戒備告文祝文牲饌視新贈之爵為等
至日夙興灑埽堂宇供張設饌案

以追贈所及
世數為準

香

案施枷如儀設改題神主案於堂東西向使人宿
宣

制者主人朝服率子弟盛服入廟諸與祭者皆會主人
詣贈主室前啟室焚香跪子弟一人奉告文跪於
主人之左讀告文辭曰維某年月日孝子某或稱孝孫
隨宜謹告於某考某官府君某妣某封某氏之靈曰
某幸得列於位恭逢

恩命

贈及先人敬請神主祇受

制書改題奉祀謹告讀訖興主人叩興奉考主子弟奉

妣主及族姓出廟門俟於道左宣制者奉

制書前引二人導行至廟衆跪接

制書入中門升中階南向立衆皆隨入至階下序立主人奉考主在東子弟奉妣主在西族姓重行立其後皆北面通贊分立東面柱前贊宣

制主人以下皆跪聽宣

制畢奉主行三跪九叩禮衆隨行禮宣制官以

制書供香案枷上主人奉主置改題案上揖勞宣制者

宣制者答揖復揖辭降自西階主人從至廟大門
外揖送入改題神主爵位訖奉主復位序立參神
讀祝三獻酒如時祭之儀祝辭曰維某年月日孝
子某謹告於顯考某府君顯妣某氏之靈曰某恭
承庭訓列位於

朝仰荷

皇仁推恩所生贈考為某銜妣為某銜感念先澤祿弗
逮養茲以焚黃謹備牲醴用伸薦告尚饗祭畢焚

黃並祝文奉主復於室闔室出主人以下皆退頌
胙於宣制者餞族姓如儀

右焚黃告祭

歲逢令節薦新物一二三品官每案時果四庶羞
四羹飯具四品至七品官每案時果二庶羞四八
品九品官每案時果庶羞各二餘同是日夙興主
婦潔辦果饌主人盛服率族姓子弟入廟然鐙灑
掃設案室前訖盥洗啟室子弟分陳匙箸壺琖之

屬於案北主人序立於香案前族姓以次序列於
主人之後主人跪焚香訖叩興子弟奉果羞從主
人詣高祖考妣位前薦果薦羞畢子弟舉壺取棧
酌酒進於主人主人奠酒訖子弟復奉羹飯從主
人薦羹飯訖以次詣各案薦奠如前儀退至香案
前率族姓子弟一跪三叩興子弟徹饌主人闔室
皆退

右時節薦新

月朔望日主人豫備茶食之屬每案二器主人夙興盥洗盛服率族姓子弟入廟灑掃潔神案啟室序位於香案前主人跪焚香訖叩興子弟奉食及茶從主人詣各神案前以次供食供茶畢退復位率族姓子弟行禮如時薦之儀徹主人闔室皆退

右朔望獻茶

庶士

貢監生員有頂帶者

家祭之禮於寢堂之北為龕以版

別為四室奉高曾祖禰皆以妣配位如前儀南向

前設香案總一服親男女成人無後者按輩行書
紙位祔食男東女西相向事至則陳已事焚之不
立版歲以春夏秋冬節日出主而薦菜盛二槃肉
食果蔬之屬四器羹二飯二前期主人及與祭者
咸致齋薦之前夕主婦盛服治饌於房中厥明夙
興主人吉服率子弟設香案於南然燭置祭文堂
北設供案二昭東穆西均以妣配位均南向設祔
案於兩序下各一男東女西東西向主人以下盥

奉木主設於案設祔位於兩序案訖主人東階下
立衆各依行輩東西序立主人詣香案前上香畢
率在位者一跪三叩興主婦率諸婦出房中薦七
箸醯醬跪叩如儀退子弟奉壺主人詣神案以次
斟酒薦熟訖皆就案南跪叩興子弟薦祔位畢主
人跪在位者皆跪祝進至香案之右讀祭文辭見
品官
祭禮減潔牲
二字餘同
訖興退主人以下叩興再獻主婦薦
飯羹三獻主婦薦餌餅時蔬主人斟酒跪叩均如

初儀畢主人率族姓一跪三叩興祝取祭文及祔食紙位焚於庭衆出主人納木主徹退日中而餽春一舉布席於堂東西北上陳倚琖匙箸如其人數傳祭食於燕器熱酒饌族姓至主人肅入序位以行輩年齒為等旅揖即席進酒饌酬酢如禮湯飯畢長者離席告退主人送於門外諸子弟皆隨以出徹僕人餽餘食皆盡月朔望日主人及家衆夙興盥洗啟寢室然燭詣香案前依行輩序立主

人上香訖子弟奉茶主人獻茶復位率衆一跪三叩興徹茶闔室衆退若家有吉事主人盥洗啟室然燭焚香以其事告行禮如朔望儀

右庶士寢薦

庶人家祭之禮於正寢之北為龕奉高曾祖禰神位歲逢節序薦果蔬新物每案不過四器羹飯具其日夙興主婦治饌主人率子弟設案然鐙啟室奉神主於案上以昭穆序主人立於香案前家衆

序立於主人下以行輩為先後主人上香一跪三叩興主婦陳匕箸醯醬薦羹飯果羞跪叩如儀主人酌酒進於各位前凡三次皆跪一叩興畢主人率衆一跪三叩興納主於室徹退日中衆餽神食歲一舉論行輩先後同行序齒列坐酒行飯已肅揖以退月朔望日供茶然香鐙行禮告事亦如之均與庶士儀同

右庶人寢薦

欽定大清通禮卷十六